



UKA17/114
14. oktober 2017
Mimi Karlsen

2014-mi eqqumiitsuliornermut piorsarsimassutsimullu periusissiornerup nanginneqarnissaanik Naalackersuisut peqquneqarnissaat pillugu Inatsisartut aalajangiiffigisassaattut siunnersuut.

(Inatsisartunut ilaasortaq Debora Kleist, Inuit Ataqatigiit)

Inuit Ataqatigiit Debora Kleist qutsavigiumavarput 2014-mi eqqumiitsuliornermut piorsarsimassutsimullu periusissiornerup nanginneqarnissaanik Naalackersuisusut peqquneqarnissaannik siunnersuuteqarmat.

Isumaqatigilluinnarparput pisariaqartikkatsigu eqqumiitsuliornermut piorsarsimassutsimullu periusissiaqarnissarput. Pisariaqartipparput ersarissumik takusinnaassallugu eqqumiitsuliornermi piorsarsimassutsimilu qanoq ineriartortitsisinnaassalluta pilersaarusiorsinnaassallutalu.

Siunnersuuteqartup malugilluarsimavaa 2014-mi eqqumiitsuliornermut piorsarsimassutsimullu periusissiornerup ingerlaqqissimannginnera. Periusissiaq aallartinneqartoq naammassisimangilaq. Imarisai arlalippassuit soqutiginarput piviusunngorsimanatik.

2014-nilli kingorna eqqumiitsuliornermut inatsit naammassineqarpoq. Eqqumiitsuliornerup piorsarsimassutsillu iluini periusissiaq inatsit nutaat pingasut aqqutigalugit nassuiaaffiginiarlugu Naalackersuisut toqqarsimavaat, tassalu: eqqumiitsuliorneq pillugu inatsit, piorsarsimassuseq pillugu inatsit aamma timersorneq timigissarnerlu pillugit inatsit. Taamaammatt qujanartumik 2014 kingorna suliaqartoqarpoq, naammassisaqarfiusunik.

Naalackersuisut naalackersuisooqatigiinnissamik isumaqatigiissutaanni ima ilaqarpoq: "Naalackersuisooqatigiit siuttuunermini kulturikkut ingerlatsineq suliaassallu pillugit nassuiaammik suliaqartitsinissaq siunniuppaat". Qujanaqaarlu Naalackersuisut nassuiaat kingusinnerusukkut suliarineqarumaarpoq nalunaarutigimmassuk.

Inuit Ataqatigiinni isumaqarluinnarpugut eqqumiitsuliorneq piorsarsimassutsimillu ingerlatsinerput anersaakkut nukittuutaasartoq, inuiaqatigiinni ataatsimoortitsisartoq aammalu inuit nammineerlutik isummersorsinnaanerannut inerisaaqataasartoq. Ataatsimut naatsumik taallugu: Inuiaqatigiit eqqumiitsuliornikkut piorsarsimassutsikkullu nukittuut inuiaapput nukittuut.

Inuiattut nukittoqutitta ilaat, eqqumiitsuliorneq piorsarsimassuserlu nukittutinniarutsigit anguniagassartalimmik pilersaaruteqartariaqarpugut.

Pilersaaruteqartariaqarpugut oqaatsitta qanoq ineriartornissaminnut periarfissaqartittuarnerat takusinnaajumallugu.

Pilersaaruteqartariaqarpugut isiginnaartitsinikkut, filmiliornikkut qanoq ineriartortitsissanerluta. Atuakkiortarnitta qanoq periarfissaqartilluarnissaa takorloorsinnaasariaqarparput, soorlu siunissami atuakkiornermut ilinniarfiliussanerluta, qitinnermut ilinniarfeqassanerluta. Qilaatersortarnerup qanoq akuerisaallunilu ineriartortinnissaa takorloorsinnaallugulu pilersaarusiorsinnaasariaqarparput.

Nipilersortartortatta ilinniarfissaqartinnissaat, aningaasarsiorluarsinnaanissaat allallu pilersaarusiorsinnaasariaqarpagut.

Inuiaavugut anersaakkut ineriartortitsiuarinnissatsinnik pisariaqartitsisut, tamannalu pilersaarusiorneqartariaqarpoq.

Eqqumiitsuliornerup piorsarsimassutsikkullu suliaqartut aamma aningaasarsiornermi iluaqusersinnaanerat ineriartortittariaqarparput, minnerunngitsumillu nunatta aningaasatigut qanoq iluaquserneqarsinnaanera nalunngittariaqarput.

Taamaammat siunnersuuteqartooq eqqumiitsuliornermut piorsarsimassutsimullu periusissiornerup nanginneqarnissaanik taperserlugu siunnersuut ataatsimiitsitaliamut susasaqartumut ingerlateqqipparput.